

112
L'ADIEV BVRLESQVE
DE
LA FRANCE
A
LA GVERRE.



A PARIS,

Chez PIERRE DV PONT, au Mont S. Hilaire,
rue d'Escoffe.

M. DC. XLIX.

Avec permission.

LA BIBLIOTHEQUE

DE

LA FRANCE

CASE

F

39

1326

1649 ad

THE NEWBERRY
LIBRARY

Ou lors que ces grands escogriffes,
Trouuent sur quoy ietter les griffes.

C'est assez nourrir vos valets,
C'est assez plumer nos p^rulets,
C'est assez roder le village,
C'est assez le mettre au pillage,
C'est assez rauager les champs,
C'est assez faire les meschans,
C'est trop souffrir de vos fredaines,
Qui donnent les sievres cartaines
Aux villageois des environs:
C'est, n'en desplaise aux fanfarons,
Trop exercer de violences
Et trop commettre d'insolences;
Baïser les femmes dans les lits,
En presence de leurs marris,
Et par vn sale vitupere,
Contraindre vn miserable pere
A voir embrocher à ses yeux
La fille qu'il ayme le mieux.
Je suis lassé de vos sottises,
Qui n'espargnent pas les Eglises:
Dans vos sales brutalitez;
Les Prestres par vous mal traitez,
Et tant de richesses sacrées
Dont vos mains se sont emparees,
Sans respect du temps ny du lieu,
Des Saints ny Saintes, ny de Dieu.
L'excitent à prendre vengeance
D'une si sacrilege engeance,
Et vont attirer sur son chef
Quelque espouuantable meschef.

Enfin donc, Madame la Guerre,
Il faut bien loin de cette terre,
Maugré vous & maugré vos dens
Vous, vostre suite, & tous vos gens
Sur le beau chant de Guillemette
Deloger, non pas sans trompette,
Car pour orner vos Legions,
Il faut tous ces brimborions
Et ces beaux instrumens de balles,
Iusques aux sifres & timballes,
Et si tambour ne battoit pas.

Drille

Drille ne feroit pas vn pas :
 Emportez-les donc, ie vous prie,
 Je renonce à cette harmonie,
 Et n'entendray plus deormais,
 Que les instrumens de la paix,
 Les violons & les musettes,
 Les luts avec les epinettes,
 Et cent autres beaux instrumens,
 Dont les concerts doux & charmans,
 Diront nargue, & feront la nicque
 A vostre infernale musique.

Allons prestement, detalez,
 Tous vos meubles sont embalez,
 Ou bien p'utoft vostre pillage;
 Vous voila bien en equipage,
 On a chargé tous vos fourgons,
 Vos Cavaliers & vos Dragons
 Sonnent déjà le boute-selle,
 Qui vous retarde donc la belle ?
 Ha ie comprends bien le secret,
 C'est que vous auez du regret
 De quitter ces terres fertiles,
 Ou vos Capitans & soudrilles
 Se trouuoient si bien sans mentir,
 Qu'ils n'en voudroient iamais sortir
 Sans cette contrainte retraïtte,
 Qu'ils font comme les chats qu'on foïette,
 Mais ils nous ont assez rongé,
 Et si leur desir enragé
 Estoit d'engloutir tout le reste,
 Le Diable leur casse la teste,
 Ou qu'ils aillent vn peu plus loin,
 Fourre la griffe & le grouin
 Contre le Turc & l'Angleterre;
 C'est là que Madame la Guerre
 Pourra se seruir de ses droits
 Ense chamaillant pour la Croix,
 Ou le plus souuent pour la pille,
 C'est là que le fer est utile,
 Estant contre vn tel ennemy,
 A diable diableffe & demy,
 Allez-y ie vous le conseille,
 Vous vous faites tirer l'oreille.

6
C'est pourtant vn faire le faut,
le le dis tout clair & tout haut,
Et sans marchander dauantage
Commencez à plier bagage.

Ha! ie voy vos enfans perdus,
Qui faisoient tant les entendus
En fait de siege & de bataille,
Mais quoy, leur mine ny leur taille.
Ne me font rien iuger de tel,
Ils craignent trop le coup mortel,
Et quoy qu'ils fassent bonne mine,
Ils tiennent mieux à la cuisine
Qu'à la teste des escadrons.

Qui sont ces autres fanfarons
Auecques leurs grandes moustaches,
Leurs jüst'au-corps & leurs panaches,
Et dont la plupart sont armez;
Pour estre si bien emplumez
Ils nous ont bien plumé la poule;
Ha! Dieu comme ils marchent en foule,
Ce sont des Chefs comme ie croy;
Les voila bien en desaroy,
De dépit, de rage & de honte,
De n'auoir pas bien fait leur compte;
Adieu vous dis mes bons Messieurs,
Il faut chercher fortune ailleurs,
France n'est pas à vostre vsage,
Si vous auez tant de courage,
Allez l'exercer sur l'Anglois,
Ou sur l'ennemy de la Croix,
Tournez-moy le dos ie vous prie;
Car voicy la Caualerie,

Vrayement voila donc des gens bien faits,
Et l'on a veu de leurs effets,
Ils ont bien pillé la campagne,
Tous ces Allemans d'Allemagne,
Et ces gros piffres de Lorrains,
Escogriffes & goulpharins,
Oltre qu'ils ont farcy leurs trippes
Ils entrolent de bonnes nippes,
Mais si l'on leur auoit osté
Tout ce qu'ils nous ont emporté,
La Compagnie & le bagage,

Marcheroit en triste equipage,
 Allez, ne vous arrestez pas,
 Adieu vous dis ie, doublez le pas,
 Faites place à l'Infanterie.

Voila bien de la pietrerie,
 Hé que de drilles morfondus,
 On les prendroit pour des pendus;
 Dieu qu'ils sont de mauuaise mine,
 O ! la dangereuse vermine,
 Elle a bien gasté le pays,
 Elle a bien pillé nos Louis
 Et violé de pauures filles,
 Adieu cadets, Adieu soudrilles,
 Mais qui marche là derriere eux?
 Des innocens iaunes & bleus,
 Barbe raze & teste pelée,
 Et d'un bonnet gras affublee,
 Ce sont ie croy des Polonois,
 Qu'ils sont laids au prix des François;
 Et qu'ils sont bien nommez Polacres,
 Ces ladres vers & ces gros poacres,
 Ces affamez, ces loups garous,
 Ces carnassiers, ces croque pous,
 Qui mangent iusques à la charogne :
 O Dieu qu'elle vilaine trogne,
 Fi, passons viste & detalons,
 J'ayme bien mieux voir leurs talons
 Que de contempler leur visage.

Quoy voicy desia le bagage,
 Ho, que de vilains Margajats,
 Que de frippons, que de goujats,
 Quel embarras & quel meslange,
 Ce n'est rien que bouë & que fange;
 Les marmittes & les poellons
 Font de grotesques carillons
 Qui s'accordent bien aux musiques
 Des chiens, des chats & des bouriques,
 Dont quelques cocqs font le dessus,
 Gens de village courez sus,
 Et par le droict de reprefaille
 Deualisez cette caraille,
 Qui s'est garnie à vos despens.

Mais non, car voicy de leurs gens,

Qui vous pourroient donner nazarde
C'est sans doute l'arrieregarde,
Ces Soldats & ces Officiers,
Plus mal bastis que les premiers,
Font bien connoistre que la Guerre
Ne produit que de la misere,
Il faut les voir iusques au bout.
Adieu croquans, est-ce là tout,
Qu'aucun de vous icy ne reste,
Car ie vous hay comme la peste.
Enfin voicy l'heure & le lieu,
Que la France vous dit Adieu,
Adieu donc, Madame la Guerre
Dieu vous conduise & le tonnerre,
Vous n'irez pas sans tabourin,
La Paix arriue avec son train
Qui vous menace d'estriuières,
Et vous pourroit tailler croupiere:
Ha! qu'elle vient bien à propos;
Pour me reestablr en repos,
Et me rendre à iamais heureuse,
Après cette guerre ennuyeuse.

F I N.